

## 2. 't Dörske zaat óp de sturrejan

Leest heb ik èn un twénjtjich Méélse mense gevraocht wa ze de sjònste, èchte Méélse weurt vónge.

Ze mooste mij dur tien of twénjtjich óp un briefke gééve.

Vur de méste was dè gauwer gezi dan gedao. Mèr óp un gegééve mómènt haa ik al hél wa bijén. Ik bèn toen èn ut tèlle gegao èn ik héb un sort "top-tien" van Méélse weurt durutj saamegesteelt.

Géllie begriep wal dè ge vur unne dórvroochte "top-tien" nog wa mieër mense moet vraoge, mèr zo as gewunlek: den titj óntbraak.

Mesjien dè d'n utjslag toch wal wa zi. Mèr dor kóm ik daalik óp terug.

As ge de vòlgende zinne goe kéént lééze èn verstaot, dan wittege al un hél bietje van ut Mééls af. Al die weurt héb ik utj de antwoorde gehalt.

- Gao ge ók wa kuttelpérkes zömmere mi unne dòrslag.
- Ik moet de vurhò nog teule, mèr dan doe ik uurst min kemasse èn.
- Hier hérrege unne hampel miemerkes èn kroessele.
- Nò de zwaor sjoer kwaam ur nog unne houwmouw bij.
- De wichter waare èn ut kurtje springe, stókverbèèrge en èn ut tikkeloëpe.
- Die zeikstreen duu zò taaperèèchtich.
- Swèrres droeg Sjèng un wémmeske èn zjn wief unne nuzzik.
- 't Vròmmes stóng mi un sjóttelslèt èn de pómpstieën te kuumme.
- In de boegend stikte ut van de peunje.
- Kerboet, hötvlés èn sjóngk, dè is nog us goe ééte.
- 't Dörske zaat in de sturrejan te sjommele.
- Keub stékt de siegaar èn mi unne vuurkètser mèr ók wal us mi un zwéégelke.
- Mi un groeëte géért, un viem of un kurtje èn wa dég ging Graad óp louw visse.

- De sjoester makte de sjoen sjòn allik.

En zò ken ik dörgao. Mer wa was nou de "top-tien"?

Van de twénjtjich persoone han dur tien 't woort **dörske** ópgegévve, acht han **kievaloeët**, zis han **keisjeut** èn **tesnuzzik**.

Vur plats vijf tot tien kwaame dan **teule**, **hötvlés**, **nusterke**, **sjollek**, **miemerkes**, **krutj** èn **dórslag** of **dörslag** in ènmèèrking. Want dees weurt han vier persoone genuumt. Toch wal un sjòn rijke um mi vur de tilleviesie te komme, nie?

Ik wit nog nie mi al dè bij elkaar gezómmer, of ut nou doorslag, dörslag of dörslag moet zin as ut Méélse woord vur vergiet.

Mesjien dè ik dè mi de Vastelaevent wal te huure krieg, wa ut nou presies moet zin.



*kéjsjeute, bókspringe, kurtje springe èn kieveloeëte*

Of spult hier utzèlfde as bij kéés of kieës?

De ieën helleft van Méél zi ut zus èn de ander helleft zi ut zoeë.

Mèr as iemmes utj Hèlde in ut tilleviezieprógramma "Wedden dat" de betieëkenis van Méélse weurt zou moete raoje, dan héb ik hier nag un sjon zinneke, wòr hie hél wa èn te raoje zò hébbe: "Bij óns mooder óp de pómpstieën stónge unne tèlder mi unne lippel èn un riekske, un soepkoom mi un sjuumspaan, unne dórslag mi mòrremoes, unne kittel mi zoermoes èn poor, èn bótter mi wa ròmmen",

Wédde detjie ze nie allemòl wit!!

*Herman van de méster*